

Kalaallit Nunaannut bil-ersinnaanermut allagartaq (kørekort-i) pillugu nalunaarummut

Missingiut

Inatsimmik nalunaarut nr. 995, 26. oktober 2009-meersoq naapertorlugu, Kalaallit Nunaanni angallannermut inatsimmi § 13, imm. 6, §§ 14 aamma 15, § 16, imm. 4, § 19, oqaaseqatigiit pingajuat, § 21 aamma § 56, imm. 2 malillugit, Færdseksstyrelsen-ip suliassai aamma pisinnaatitaaffii kiisalu naammagittaalliorfissiissutai pillugit nalunaarummi nr. 373, 9. april 2024-imeersumi § 4 naapertorlugu piginnaatitaaneq malillugu tulluuttut aalajangersarneqarpoq:

Kapitali 1

Aalajangersakkat nalinginnaasut

§ 1. Tamatumunnga akuerisaasoq immersugassaq, bil-ersinnaanermut misilitsinnissamut innersuunneqarnissaq pillugu qinnuteqaat, tulluuttut:

- 1) Assiliivimmik assilisaq assingulluartoq asseq, (inuup kinaassusianik ersersitsisoq, nasaqanngitsoq) 35 x 45 mm-inik angissusilik. Aserujaatsuussaaq aammalu fotopapir-imut nalinginnaasumut saattumut assilineqarsimasoq (kopiigaq) aammalu naqissusigaanngitsoq,
- 2) pisortanit atuutilersitaasoq, tamatumani qinnuteqartup inuttut normuanik ersersitsisoq kinaassutsimut uppernarsaat pappialaq, kiisalu
- 3) nakorsap peqqissuunermut allagarsiussaa,

kakkiullugit, politiinut imaluunniit kommunefoged-imut tunniunneqassapput.

Imm. 2. Qinnuteqartoq, upperisamik tunngavilimmik tamatuminnga noqqaassuteqarnermik saqqummiussippat, imm. 1, nr. 1-imi eqqaaneqartumi assimi, qinnuteqartoq nasartaateqarsinnaasoq/nasaqarsinnaasoq, Politiinit akuerineqarsinnaavoq.

§ 2. Nakorsap peqqissuunermut allagarsiussaa, immersugassami, Peqqissutsimut Naalakkersuisoqarfimmit akuerisaasumi, atuutilersinneqarsimassaaq. Qinnuteqartup nalinginnaasumik napparsimmavianiit imaluunniit assigisaaniit allagarsiussaq nakorsamit atuutilersitaassaaq. Nakorsap allap allagarsiussaq atuutilersippagu, qinnuteqartup tamanna tamakkiisumik tunngavilersussavaa. Nakorsap allagarsiussaani nassuiarneqartoq inuk taannaanersoq, taanna inuk, assimiittumut assiusutut uppernarsaasiinermut, assip tunuatigut nakorsaq oqaaseqaatitalimmik atsiussaaq. Oqaaseqaatitalimmik atsiorneq, meqqitut allaasutut ikkussaanani, toqqaannartumik assip tunuani allataassaaq. Allagarsiussaq aamma asseq, nakorsamit, politiinut imaluunniit kommunefoged-imut toqqaannartumik nassiunneqassapput, imaluunniit, nakorsap atsiorneranik pilikkamik, allakkat puuani matoqqasumi qinnuteqartumut tunniunneqassalluni.

Imm. 2. Nakorsamit peqqissuunermut allagarsiussaq, qinnuteqaatip tunniunneqarnerani, qaammatinit pingasunit pisoqaaneroqqusaanngilaq bil-ersinnaanermullu allagartap atuutilersinneqarnerani ukiumit ataatsimit pisoqaaneroqqusaani.

§ 3. Nakorsap peqqissuunermut allagarsiussaani paasissutissat tunngavigalugit, bil-ersinnaanermut allagartap kissaatigineqartup pinissaanut, qinnuteqartup peqqissutsimut piumasaqaataasut naammassinera i politiit aalajangiivigissavaat.

Bil-ersinnaanermut allagartaq atuutilersinneqarsinnaanersoq imaluunniit atugassarititaasuni immikkut ittuni atuutilersinneqassanersoq aalajangiinissamut ilassutitut paasissutissanik nakorsamit immikkut ilisimasalimmit imaluunniit allamit, nalunaarummik pissarsisoqassasoq, politiinit piumasaqaatigineqarsinnaavoq. Politiinit toqqagaasumit politiimit, bil-ersinnaanermut allagartaq, imaluunniit atugassarititaasuni immikkut ittuni, atuutilersinneqarsinnaanersoq nalilerniarlugu, qinnuteqartoq piginnaasanik ersersitsisussamik bil-ernermik misilitsissasoq, aammattaaq politiinit piumasaqaatigineqarsinnaavoq. Qinnuteqartoq bil-inik sungiusaatissatut akuerisaasunik pissarsissasoq politiinit piumasarineqarsinnaavoq.

§ 4. Piffissamik killilimmik atuuffissalerlugu, imaluunniit bil-inut immikkut piumasaqaatinut allattukkanik naammassinittumik killilerlugu imaluunniit allatut atugassarititaasunik immikkut ittunik piumasaqaateqarfiusumik bil-ersinnaanermut allagartaq atuutilersinneqarsinnaavoq. Motorcykel-inut ingerlatsisinnaanermut allagartaq pillugu sukumiinerusumik maleruagassat aalajangersassallugit Kalaallit Nunaata Politiivi piginnaatitaapput.

Imm. 2. Innarluutilinnut qamuteeqqanut arriitsunut ingerlatitsisinnaanermut allagartaq, inunnut 15-ileereersimasunut atuutilersinneqarsinnaavoq.

§ 5. Qinnuteqartoq ikiaroorartunik pinngitsuuisinnaanngitsoq imaluunniit aanngajaarniutunik allanik imaluunniit imerajuttuuneranik paasissutissaqarpat, ingerlatitsisinnaanermut allagartaq atuutilersinneqassanngilaq.

Imm. 2. Ingerlatitsisinnaanermut allagartaq itigartitsissutigineqarpat, tamatumunnga apeqqut, Kalaallit Nunaannut pinerluttulerinermik inatsimmi § 164, imm. 3-mi maleruagassat malillugit eqqartuussivinnut suliaasiissutigineqarnissaa piumasarineqarsinnaavoq.

Kapitali 2

Bil-ersinnaanermut sungiusarneq aamma bil-ersinnaanermut misilitsinnerit

§ 6. Qamutit immikkoortitsernerinut tulliuttunut bil-ersinnaanermut allagartamik angusinissamut misilitsittoqarsinnaavoq:

1) Immikkoortitigaq (Kategori) B (Bil-it nalinginnaasut). Aquttuata saniatigut, amerlanerpaamik inunnut arfineq pingasunut inissallit bil-it, tamakkiisumillu 3500 kg.-ut ataallugit oqimaassusillit. Bil-inut nalinginnaasunut bil-ersinnaanermut allagartaq, aammattaaq tulliuttunik:

- a) Tamakkiisumik akuerisaasumik 3500 kg.-ut ataallugit oqimaassusillit nioqqutissanik assartuutit bil-it,
- b) inunnut- imaluunniit nioqqutissanut assartuutit bil-it, akuerisaasumik 750 kg.-nit oqimaannerunngitsunik ikkuttakkanik kalitallit,
- c) inunnut- imaluunniit nioqqutissanut assartuutit bil-it, akuerisaasumik 750 kg.-nit oqimaannerusunik ikkuttakkanik kalitallit, kalitariit katillutik tamakkiisumik akuerisaasumik 3500 kg.-nik qaangiinngippata,

- d) motorcykel-it pingasunik assakaasullit,
- e) Traktor-it/sakkut motor-illit,

ingerlatsinissamut pisinnaatitsivoq.

2) Immikkoortitikkat (Kategori) C-D (Lastbil-it aamma inunnut bil-it angisuut). Lastbil-it tamakkiisumik akuerisaasumik 3500 kg.-ut sinnerlugit oqimaassusillit aamma aquttup saniatigut arfineq pingasut sinnerlugit issiavissallit imaluunniit tamakkiisumillu akuerisaasumik 3500 kg.-ut sinnerlugit oqimaassusillit inunnut bil-it. Lastbil-inut aamma inunnut bil-inut angisuunut bil-ersinnaanermut allagartaq tulliuttunik:

- a) ikkuttakkanik kalitalinnik, kalitariit aammalu ikkuttakkap kalittakkap angallatip tamakkiisumik oqimaassusaa apeqqutaatinnagit, Lastbil-inik imaluunniit inunnut bil-inik angisuunik
- b) kalittakkanik assakaasulinnik motor-ilinnik,

ingerlatitsinissamut pisinnaatitsivoq.

Imm. 2. Aammattaaq inuussutissarsiutigalugu inunnik assartuinissamut bil-ersinnaanermut allagartamik atuutilersitsisoqarsinnaavoq.

Imm. 3. Kalaallit Nunaata Politiivi motorcykel-inut ingerlatsinermik misilitsinnermut maleruagassanik sukumiinerusunik aalajangersaanissamut piginnaatitaapput.

§ 7. Immikkoortitikkamut (kategori-mut) kissaatigineqartumut, qinnuteqartoq siusinnerusukkut bil-ersinnaanermut allagartaqarsimangippat, pineqartoq, immikkoortitikkamut (kategori-mut) pineqartumut politiinit akuerisaasumit inummit, bil-ersinnaanermut piginnaasanut ilinniartitaasimassaaq.

Imm. 2. Atuagarsorluni ilinniartitsineq, Kalaallit Nunaanni bil-ersinnaanermut ilinniartitsinnermut Atuagarsorluni ilinniut naapertorlugu, ingerlanneqarsimassaaq.

Imm. 3. Immikkoortitikkamut (kategori) C-D'mut ilinniartitsineq, qinnuteqartoq immikkoortitikkamut (kategori-mut) B-mut bil-ersinnaanermut allagartamut angusereersimappat aatsaat, aallartinneqarsinnaavoq. Taamaattoq qinnuteqartoq immikkoortitikkamut (kategori-mut) B-mut bil-ersinnaanermut sionatigut allagartaqarnikuusimappat, pineqartup bil-ersinnaatitaajunnaarallarsimanera apeqqutaatinnagu, immikkoortitikkamut (kategori) C-D'mut ilinniartitsineq aallartinneqarsinnaavoq.

Imm. 4. Inunnut, bil-ernevermut ilinniartunut, sungiusaatitut bil-erneq, politiinit tamatumunnga akuerisaasuni bil-ini taamaallaat, pisassaaq.

Imm. 5. Bil-ernevermut sungiusarnermut bil-inik akuersissuteqarneq, ataasiakkaatut imaluunniit ataatsimut isigalugu nalunaarutigineqarsinnaavoq. Ilinniarnertut bil-erneverup nalaani, bil-it siumikkut aqumikkullu bil-ersinnaanermut ilinniutitut allagartaqassapput. Bil-ersinnaanermut ilinniutitut allagartaq qaqortuussaaq, qernertumillu »skolevogn«-imik allassimasoqassalluni.

Imm. 6. Inummik § 8 malillugu politiinit akuerisaasumik bil-ini ilinniartup sanianiittoqarpat taamaallaat, bil-ernevermut sungiusartoqaqqusaavoq. Taanna inuk, bil-ersinnaanermut sungiusarnermi, bil-inik ingerlatsisuusutut isigineqartarpoq. Bil-ersinnaanermut misilitsinnermi, ilinniartuusoq bil-inik ingerlatsisuusutut isigineqartarpoq.

Imm. 7. Sungiusaatitut bil-erneq, bil-ersinnaanermut allagartamik kissaatigineqartumik atuutilersitsinissamut piffissap qinnuteqartup ukiunik utoqqaassutsimigut piumasaqaatinik naammassinniffigisassaa qaammatinit pingasunit siusinnerusumik, aammalu inunnut apeqqutaatitaqarani allagartaajagaasimasunut, allagartaajagaaffiup naanissaaniit qaammatinit pingasunit siusinnerusumik, peqqusaanngilaq.

§ 8. Inuk, 21-nik ukioqalereersimasoq, ukiunilu marlunni bil-ersinnaanermut allagartaqareersimasoq, bil-ersinnaanermut allagartartaarnissamik kissaateqartunik allanik, pineqartoq ilinniartitsinissamut naleqquttoq, politiinit nalilerneqarpat, bil-ersinnaanermi, ilinniartitsisutut akuersissummik tunineqarsinnaavoq.

Imm. 2. Piffissamik sukumiinerusumik allatamik ukiut tallimat tikillugit akuersissut tunniunneqarsinnaavoq. Akuersissummut uppernarsaammik politiit atuutilersitsisinnaapput. Akuersissummik nutarterinermi, imm. 1-i taamatuttaaq atuupput.

§ 9. Bil-ernevermut misilitsinneq, atuagarsornermik aamma bil-ernevermik misilitsinnermik imaqarpoq.

Imm. 2. Atuagarsornermik misilitsinneq, bil-ersinnaanermut allagartaq kissaatigineqartoq atuutilersinniarlugu, siusinnerpaamik qinnuteqartup naammattunik ukioqalernissaanut qaammat ataaseq sioqullugu, pineqarsinnaavoq.

Imm. 3. Misilitsinnerup bil-ernertaa, bil-ersinnaanermut allagartaq kissaatigineqartoq atuutilersinniarlugu, aatsaat qinnuteqartoq naammattunik ukioqalerpat, nalinginnaasumik pineqarsinnaavoq.

§ 10. Ilanngussaq 1-i naapertorlugu, misilitsinnerup atuagarsornertaa ingerlanneqassaaq.

Imm. 2. Immikkoortitikkamut (kategori-mut) C-D'mut misilitsittoqarpat, qinnuteqartup, tamakku bil-it angisuut pillugit, aalajangersakkat immikkut ittut (kalitassamik katititsissutit, bremsesystem-ii, usilersornissamut maleruagassat immikkut ittut il.il.) ilisimasaqarfigissavai.

§ 11. Taassumaa inuup, qinnuteqartumik ilinniartitsisimasup, atuagarsornermik misilitsittoqartinnagu, qinnuteqaatitut immersugassami atsiornermigut, § 7, imm. 2 naapertorlugu, qinnuteqartoq ilinniartinneqarsimasoq, uppernarsassavaa.

§ 12. Bil-erluni misilitsinneq, atuagarsornermik misilitsinneq angusiffigineqareerpat aatsaat, ingerlanneqarsinnaavoq.

Imm. 2. Qinnuteqaat tunniunneqassaaq. atuagarsorlunilu angusinerup kingorna, qaammatit aqqaneq marluk qaangiutsinnagit bil-erluni misilitsinneq angusiffigineqassalluni.

§ 13. Bil-erluni misilitsinnermi, qinnuteqartoq nammineerluni tamatumunnga atugassanik bil-inik pissarsissaaq. § 7, imm. 4-mi aalajangersagaq, taamatuttaaq atuuppoq.

Imm. 2. Atuagarsorluni soorluttaaq aamma bil-erluni misilitsinnermi, qinnuteqarnermut immersugassaq aamma siusinnerusukkut bil-ersinnaanermut allagartarisimasinnaasaq nassarneqassapput.

§ 14. Qinnuteqartoq, peqqissutsimut tunngasunik peqquteqartumik § 4 naapertorlugu, ingerlatinik immikkut ittunik, imaluunniit ingerlatsissutinik immikkut ittunik pisatsersukkanik taamaallaat ingerlatsinermut allagartartaarsinnaappat, ingerlatsissutinik taamaattunik misilitsittoqassaaq.

§ 15. Ingerlatsinermut misilitsinnerup bil-ernertaa, ilanngussaq 1-i naapertorlugu ingerlanneqassaaq.

§ 16. Angallannermut maleruagassanik pingaarutilinnik ilisimasakippallaarneq pissutigalugu imaluunniit aqqorluppallaanermik peqquteqartumik Qinnuteqartoq misilitsinnermut angusinnitsoorpat, immikkoortitikkanut (kategori-nut) allanut ingerlatsinermut allagartarisimasinnaasaq piginnarniarlugu, qinnuteqartoq nakkutigisaasumik bil-erlunermut misilitsissanersoq, § 26-imi maleruagassat malillugit politiit aalajangissavaat.

§ 17. Atuagarsorluni imaluunniit ingerlatsilluni misilitsinnerup inernera, qinnuteqartumut ernertumik misilitsinnerup kinguninnguagut nalunaarutigineqassaaq.

Kapitali 3

Bil-ersinnaanermut allagartamik atuutilersitsineq

§ 18. Qinnuteqartoq bil-ersinnaanermut misilitsinnermik angusisimappat, pineqartoq, allagartartaartitsisartup takkuani, kinaassutsimut allagartamik (stamkort-imik) immersuissaaq. Taamaalioreernermi allagartartaartitsisartooq, bil-ersinnaanermut allagartaagallartumik atuutilersitsissaaq. Siusinnerusukkut bil-ersinnaanermut allagartaasimasinnaasoq, allagartartaartitsisartumut tunniunneqassaaq.

Imm. 2. Bil-ersinnaanermut allagartamik pisaarnissamut piumasaqaatit allallu eqqortinneqarpata, Kalaallit Nunaata Politiivinit bil-ersinnaanermut allagartaq atuutilersinneqassaaq. Atugassarititaasinnaasut immikkut ittut, bil-ersinnaanermut allagartami imaluunniit ilassutitut allagarsiussami allanneqassapput.

Imm. 3. Bil-ersinnaanermut allagartaq, piginnittuusup 70-iliinissaata tungaanut atuuttussamik atuutilersinneqassaaq. Piffissami bil-ersinnaanermut misilitsinnermik angusinerup nalaani qinnuteqartoq 65-iliisimappat, kisianni 70-iliisimanani, bil-ersinnaanermut allagartaq ukiunut tallimanut atuuttussiarineqassaaq.

Imm. 4. Qinnuteqartoq, piffissami bil-ersinnaanermut misilitsinnermi angusinerup nalaani 70-ileereersimappat sinnerlugilluunniit, bil-ersinnaanermut allagartaq tulluuttunik:

1) 70-inik ukiulinnut: ukiunut 4-nut,

2) 71-inik ukiulinnut: ukiunut 3-nut,

3) 72-79-inik ukiulinnut: ukiunut 2-nut,

4) 80-inik ukiulinnut: ukiumut 1-mut,
atuuffissalerlugu atuutilersinneqassaaq.

Imm. 5. Peqqissutsimut tunngatillugu paasissutissaqarpat, pineqartup imerajuttuunnginnissaa imaluunniit aangajaarniutinik allanilluunniit sianissutsimut sunniisartunik malussataarniutinik pinngitsuuisinnaanera, tusaamaneqartoq, imaluunniit tunngavissalimmik qularineqartoq, taava imm. 3 aamma 4-mi allassimasumiit piffissamiit sivikinnerusumik atuuttussanngorlugu, bil-ersinnaanermut allagartaq atuutilersinneqarsinnaavoq.

Kapitali 4

Bil-ersinnaanermut allagartap assilineri (Duplikatkørekort-i)

§ 19. Bil-ersinnaanermut allagartaq tammaaneqarpat, ajoquserneqarluniluunniit imaluunniit ima nungullartigippat, allannertai, kisitsisitali, naqitsisitali imaluunniit assitaa sumiiffiimmi misissorneqarsinnaanani, imaluunniit plastik-i illersuutaasoq ajoqusersimappat, bil-ersinnaanerlu sulii atugarineqassappat, piginnittuusup allagartap assilineranik atuutilersitsisoqarnissaa qinnutigissavaa. Taamaattoq, atermik allannguinermi- imaluunniit najukkamik allannguinermi, tamanna atuutinngilaq.

Imm. 2. Angallannermik misissuinermit atatillugu politiiit, bil-ersinnaanermut allagartaq ajoqusersimasooq imaluunniit nungullaannikoq arsaarinnissutigisinnaavaat. Bil-ersinnaanermut allagartaq sumiiffimmi arsaarinnissutigineqarpat, sapinngisamik bil-ersinnaanermut allagartaagallartumik politiiit suliarinnissapput.

Imm. 3. Bil-ersinnaanermut allagartap assilineri pillugu qinnuteqaat, politiiinut imaluunniit kommunefoged-imut tunniunneqassaaq. Qinnuteqaammut asseq kiisalu § 1, nr. 1-i aamma 2 naapertorlugit pisortanit atuutilersinneqartoq kinaassutsimut allagartaq ilanngunneqassapput. Qinnuteqartoq politiiit- imaluunniit kommunefoged-ip allaffiani kinaassutsimut allagartamik (stamkort-imik) immersuissaaq. Bil-ersinnaanermut allagartaq tammarsimappat, qinnuteqartoq aammattaaq tamanna pillugu nalunaaruteqassaaq. Bil-ersinnaanermut allagartaq ajoqusersimasooq, bil-ersinnaanermut allagartap assilineranik taarserneqarnissaanik kissaatigineqartoq, politiiinut imaluunniit kommunefoged-imut tunniunneqassaaq.

Kapitali 5

Bil-ersinnaanermut allagartamik annertusaaneq

§ 20. Bil-ersinnaanermut allagartamik immikkoortitigaq B-mik, immikkoortitikkanut C-D'nut atuutilersinniarlugu, annertusaanissaaq pillugu qinnuteqaat, politiiinut imaluunniit kommunefoged-imut tunniunneqassaaq. Qinnuteqaammut asseq kiisalu § 1, nr. 1-i aamma 2 naapertorlugit pisortanit atuutilersinneqartoq kinaassutsimut allagartaq ilanngunneqassapput.

Imm. 2. Nakorsap peqqissusermit allagarsiussaa qinnuteqaammut ilanngunneqassanngilaq, taamaattoq, politiiit pisariaqartutut nalilerneqarpat piumasarineqarsinnaalluni.

Imm. 3. Kapitali 2-mi maleruagassat naapertorlugit bil-ersinnaanermut misilitsittoqartassaaq.

Kapitali 6

Inuussutissarsiutigalugu inunnik angallassinnaanissamut bil-ersinnaanermut allagartaq

§ 21. Angallatinut motor-ilinnut bil-ersinnaanermut allagartaq, inuussutissarsiutigalugu inunnik angallassinissamut atugassaq, qinnuteqartunut

- 1) 21-nik ukioqalereersimasunut,
- 2) sivikinnerpaamik ukiumi ataatsimi, immikkoortitikkamik (kategori) B-mut (bil-inut nalinginnaasunut) bil-ersinnaanermut allagartaqareersimasumut, aamma
- 3) inuussutissarsiutigalugu inunnik angallassinissamut bil-ersinnaanermut misilitsinnermik angusisimasunut,
- 4) atuutilersinneqarsinnaavoq.

Imm. 2. Inuussutissarsiutigalugu inunnik angallassilluni bil-ersinnaanermut allagartaq pillugu qinnuteqaat, politii nut imaluunniit kommune foged-imut tunniunneqassaaq. Qinnuteqaammut asseq kiisalu § 1, nr. 1-i aamma 3 naapertorlugit pisortanit atuutilersinneqartoq kinaassutsimut allagartaq ilanngunneqassapput.

§ 22. Inuussutissarsiutigalugu inunnik angallassinissamut bil-ersinnaanermut allagartaq, qinnuteqartup bil-ersinnaanermut allagartaqarfigisaanut immikkoortitikkamut (kategori-mut) taamaallaat atuutilersinneqarsinnaavoq. Bil-ersinnaanermut allagartaq bil-inut nalinginnaasunut imaluunniit soorluttaaq bil-inut nalinginnaasunut taamatut inunnut bil-inut angisuunut atuutilersinneqarsinnaavoq.

§ 23. Inuussutissarsiutigalugu inunnik angallassinissamut bil-ersinnaanermut allagartaq, Kalaallit Nunaannut pinerluttulerinermik inatsimmi § 164, imm. 2-mi eqqaaneqartumut piumasaqaammut atatillugu itigartitsissutigineqarsinnaavoq.

Imm. 2. Inuussutissarsiutigalugu inunnik angallassinermut bil-ersinnaanermut allagartaq itigartitsissutigineqarpat, piumasaqartoqarneratigut, peqqusissuteqartartut oqartussaasut, Kalaallit Nunaannut pinerluttulerinermik inatsimmi § 164, imm. 3-mi maleruagassat malillugit, apeqqut eqqartuussisunut suliakkiutigissavaat.

§ 24. Inuussutissarsiutigalugu inunnik angallassinermut bil-ersinnaanermut misilitsinneq, §§ 9, 10 aamma 12-15-imi maleruagassat naapertorlugit pisassaaq. §§ 16 og 17-imi aalajangersakkat taamatuttaaq atuupput.

Imm. 2. Qinnuteqartoq bil-erluni misilitsinnermi, sakkunik atortoqarani, tikkuarsinnaassavai aammalu ilaatillugit nammineq oqaatsiminik, bil-it pisatai isumannaallisaanermut pingaarutillit, ilaatillugit pisattat asiilasoaqalerfiusartut aammalu nungullaaffiusartut, pillugit nassuiarsinnaassavai aammalu bremse-t aamma aquutit atornissaat, paarinissaat aammalu aserfallatsaalinnissaat kiisalu aserfallatsaaliinermut aamma paarsinermut piumasaqaataasumik ima annertussusilimmik tamakkua atuunneri pillugit ilisimasaqarfigilluarnerinik ersersitsissalluni.

Imm. 3. Bil-erluni misilitsinnermi ilinniartup aqutsilluarsinnaaneranut annertunerusumik piumasaqarfiusaaq soorluttaaq, immikkoortitikkamut B-mit (bil-it nalinginnaasunit) aammalu

immikkoortitikkamut D-mut (bil-inut angisuunut) naleqqiullugu, kukkunerit sukannernerusumik nalilerneqartassasut.

§ 25. Inuussutissarsiutigalugu inunnik angallassinermut bil-ersinnaanermut allagartaq, § 18-imi maleruagassat malillugit atuutilersinneqassaaq.

Imm. 2. Inuussutissarsiutigalugu inunnik angallassinermut bil-ersinnaanermut allagartaq pineqartoq sivikinnerusumik atuuffissaligaangippat imaluunniit peqqissutsimik peqquteqartumik sivikinnerusumik atuuffissaligaangippat, ukiunik tallimanik atuuffissalerlugu atuutilersinneqassaaq.

Kapitali 7

Bil-ersinnaatitaanermik arsaarinnineq pillugu aamma nakkutigisamik bil-ersinnaanermut misilitsinnerit pillugit aalajangiisarneq

§ 26. Bil-ersinnaanermut allagartap pinissaanut pineqartup piumasaqaatit eqqortissinnaajunnaarpagit bil-ersinnaatitaaneq politiinit arsaarinnissutaasinnaavoq.

Imm. 2. Inuussutissarsiutigalugu inunnik angallassinermut bil-ersinnaatitaaneq, Kalaallit Nunaannut pinerluttulerinermik inatsimmi § 164-imi maleruagassat naapertorlugu atorunnaarsinneqarsinnaavoq.

§ 27. Pineqartoq bil-ersinnaanissamut suli piginnaaneqarnerisq, angallannermut maleruagassanik pisariaqartunik ilisimasaqarnerisq, imaluunniit angallattunik allanik eqqarsaatiginninnissamik paasisimasaqarnerisq, tunngavissaqarluni qularutigineqarpat, kapitali 10 naapertorlugu bil-ersinnaanermut allagartamik piginnittoq nakkutigisamik bil-ersinnaanermut misilitsissasq, politiinit aalajangerneqarsinnaavoq. Politiinit aalajangerneqartumik piffissaliussap iluani misilitsittoqassaaq.

Imm. 2. Politiit aalajangiinnerannut peqqutaasut pissutsit malillugit, pineqartup bil-ersinnaanermut misilitsinneq angusiffigisimappagu, nakkutigisamik misilitsittoqassanngilaq.

Imm. 3. Bil-ersinnaanermut allagartalik nakkutigisamik bil-ersinnaanermut misilitsinnermut peqataajumangippat, ingerlaannartumik bil-ersinnaatitaanermik politiit arsaarinnissuteqarsinnaapput. Aammattaaq, siullermeerluni misilitsinneq angusiffiunngippat, bil-ersinnaatitaaneq arsaarinnissutigineqassaaq.

§ 28. Kukkoqqinnermi bil-ersinnaatitaaneq arsaarinnissutaasussaappat, politiinit aalajangersarneqartup piffissarititaasup iluani, bil-ersinnaatitaanermut allagartalik, kapitali 10 naapertorlugu, nakkutigisamik bil-ersinnaanermik misilitsissaaq.

Imm. 2. Taamaattoq, arsaarinninnermut pissutaasut pissutsit malillugit pineqartup bil-ersinnaanermut misilitsinneq angusiffigisimappagu, nakkutigisamik bil-ersinnaanermut misilitsittoqassanngilaq.

Imm. 3. Bil-ersinnaanermut allagartaalik, nakkutigisamik bil-ersinnaanermut misilitsinnermut peqataajumangippat, bil-ersinnaatitaaneranik arsaarinnissinnaapput. Aammattaaq misilitsinneq siullermeernermi angusiffiunngippat, bil-ersinnaatitaaneq arsaarinnissutigineqassaaq.

§ 29. Bil-ersinnaanermut allagartalik suli naammaginatutimik peqqissuseqarnera imaluunniit imerajuttuunnginnissaa imaluunniit aanngajaarniutinik allanilluunniit sianissutsimut sunniisartunik malussataarniutinik pinngitsuuisinnaanera, tunngavissaqartumik qularineqartoq politiinit maluginiarneqarpat, tamatumunnga aalajangiinissamut pisariaqartumik misissortissalluni imaluunniit misilitsissalluni, ilaatillugit §§ 3 aamma 5-i naapertorlugit, nakorsap, pisariaqassappat nakorsap immikkut ilisimasallip, allagarsiussaaniq pissarsissalluni, pineqartoq pisussaavoq. Nakorsap allagarsiussaanut aningaasartuutit il.il. bil-ersinnaanermut allagartallup akilissavai.

Imm. 2. Bil-ersinnaanermut allagartalik, pisariaqartunik misissortinnissanut imaluunniit misilitsinnernut peqataajumangippat, bil-ersinnaatitaaneq politiit arsaarinnissutigisinnaavaat.

Imm. 3. Misissuinerit imaluunniit misilitsinnerit tunngavigalugit bil-ersinnaatitaaneq arsaarinnissutaassanersoq imaluunniit, § 4 aamma § 18, imm. 5-i naapertorlugu immikkut ittunik killilersuutaasinnaasunik ilalerlugu, bil-ersinnaanermut allagartallup bil-ersinnaatitaaneq piginnassaneraa aalajangerneqassaaq.

Imm. 4. Bil-ersinnaatitaaneq annikillisaaserneqarpat, bil-ersinnaanermut allagartamik nutaamik atuutilersitsisoqassaaq. Pineqartoq, § 1, nr. 1 aamma 2 naapertorlugit assimik aammalu pisortanit atuutilersitamik kinaassutsimut uppernarsaammik tamatumani qinnuteqartup inuup normua ersersitsisumik, tunniussissaaq kiisalu politiini imaluunniit kommunefoged-imi kinaassutsimut uppernarsaammik (stamkort-imik) immersuissalluni.

Imm. 5. Pineqartup imerajunnera imaluunniit aanngajaarniutinik imaluunniit sianissutsimut malussataarniutinik allanik pinngitsuuisinnaannginnera pissutigalugu bil-ersinnaatitaanera arsaarinnissutigineqarpat, apeqqut eqqartuussivinnut tunniunneqassasoq piumasarineqarsinnaavoq.

§ 30. Bil-ersinnaatitaaneq arsaarinnissutaassasoq politiinit aalajangerneqarpat, imaluunniit apeqqutaatitaqanngitsumik bil-ersinnaatitaaneq arsaarinnissutaappat, bil-ersinnaanermut allagartaq politiinut imaluunniit kommunefoged-imut tunniunneqassaaq. Taamatuttaaq, § 29, imm. 3 malillugu bil-ersinnaatitaanermi killiliussaqqarpat, bil-ersinnaanermut allagartaq politiinut imaluunniit kommunefoged-imut tunniunneqassaaq.

Kapitali 8

Bil-ersinnaatitaanermik pigisaqaqqilerneq

§ 31. Bil-ersinnaatitaanerup politiinit arsaarinnissutigineqareernerani imaluunniit apeqqutaatitaqanngitsumik arsaarinnissutaareernerani, bil-ersinnaanermut allagartamik pisaaqqinnissaaq pillugu qinnuteqaat, politiinut imaluunniit kommunefoged-imut tunniunneqassaaq. Qinnuteqaammut, § 1, nr. 1 aamma 2 naapertorlugit asseq kiisalu pisortanit atuutilersinneqartoq kinaassutsimut uppernarsaat ilanngunneqassapput. Nakorsaqqarnikkut pissutaasut imaluunniit ikiaroorartunik sianissutsimilluunniit aanngajaarniutinik allanik pinngitsuuisinnaajunnaarneq imaluunniit imerajunneq pissutigalugu bil-

ersinnaatitaaneq politiinit arsaarinnissutigineqarsimappat, aammattaaq § 1, nr. 3 naapertorlugu nakorsamit allagarsiussaq tunniunneqassaaq. Aammattaaq bil-ersinnaanermut allagartamik atuutilersitsinermut imaluunniit nutarterinermut allanulluunniit pissutsinut atatillugu tunniunneqartoq, siusinnerusukkut nakorsamit allagarsiussaq, tamatumunnga pissutissaqalersitsippat, taamaallaat nakorsamit allagarsiussaq piumasqaataavoq.

§ 32. Apeqqutaatitaqanngitsumik bil-ersinnaatitaaneq arsaarinnissutaasimappat, kapitali 10 naapertorlugu qinnuteqartoq nakkutigisamik misilitsinnermik angusisariaqarpoq. Piffissap arsaarteqqaffiusimasup naanissaa siusinnerpaamik qaammammik ataatsimik sioqqullugu, bil-erluni misilitsinneq ingerlanneqassaaq.

Imm. 2. Nakkutigisamik misilitsinnermik ingerlatsisoqarsimannginnera imaluunniit angusisoqarsimannginnera pissutaalluni bil-ersinnaatitaaneq politiinit arsaarinnissutigineqarsimappat, allagartartaaqqinneq aatsaat nutaamik nakkutigisamik bil-ersinnaanermut misilitsinneq angusiffigisimagaanni, pisinnaavoq.

Imm. 3. Ikiaroorartunik imaluunniit aanngajaarniutinik allanik pinngitsuuisinnaannginnermik, imerajunnermik peqquteqartumik, imaluunniit peqqissutsimut paasissutissanik peqquteqartumik, ukiut pingasut sinnerlugit bil-ersinnaatitaaneq politiinit arsaarinnissutaasimappat, nakkutigisamik bil-ersinnaanermut misilitsinneq angusiffigineqassasoq, nalinginnaasumik allagartartaaqqinnissamut piumasqaataavoq.

§ 33. Bil-ersinnaanermut allagartamik pisaaqqinnissamut qinnuteqartup piumasqaatit naammassippagit, § 18-imi maleruagassat naapertorlugit bil-ersinnaanermut allagartaq suliarineqassaaq.

§ 34. Bil-ersinnaatitaanermik pigisaqaleqqinniarneq pillugu qinnuteqarnermi, qinnuteqartoq bil-ersinnaatitaanermik arsaarinniffiusumi imaluunniit akuerisaajunnaarfiusumi piffissami tamatumani, inuussutissarsiutigalugu inunnik angallassisinnaanermut atuuttumik allagartaqarsimappat aammalu arsaarinninnissamik imaluunniit akuerisaajunnaarsitsinissamik aalajangiinnermi aammalu eqqartuussivimmit inuussutissarsiutigalugu inunnik angallassisinnaanermut immikkut ittumik akuerisaajunnaarsitsineq pillugu aalajangiisoqarsimanngippat, immikkut ittumik tamatumunnga misilitsinngikkaluarluni, bil-ersinnaanermut allagartaq, inuussutissarsiutigalugu inunnik angallassisinnaanermik ilalerlugu annertusineqarsinnaavoq. § 23 aamma § 25, imm. 2-mi aalajangersakkat taamatuttaaq atuupput.

§ 35. Inunnut motorcykel-inut allagartaqarsimasunut, aammalu allagartaajagaasimasunut, Kalaallit Nunaata Politiivi nakkutigisamik ingerlatitsisinnaanermut misilitsinnermik ingerlatsisarnissamut piginnaatitaapput.

Imm. 2. Misilitsinnermut 450 kr.-inik akiliuteqartitsisoqartassaaq, taamaattoq § 49, imm. 2 takujuk.

Kapitali 9

Bil-ersinnaanermut allagartamik nutarterineq

§ 36. Piffissap atuuffiup naalernerani bil-ersinnaanermut allagartamik nutarterineq pillugu qinnuteqaat, politiinut imaluunniit kommunefoged-imut tunniunneqassaaq. Qinnuteqaammut § 1-i naapertorlugu asseq, nakorsamit allagarsiussaq kiisalu pisortanit atuutilersinneqartoq kinaassutsimut uppersaata ilanngunneqassapput. Aammattaaq qinnuteqartoq politiini imaluunniit kommunefoged-imi kinaassutsimut uppersaammik (stamkort-imik) immersuissaaq.

§ 37. Bil-ersinnaanermut allagartap atuuffiata qaangiunnerata, ukiut pingasut amerlanerilluunniit kingorna, bil-ersinnaanermut allagartamik nutarterinissaq pillugu qinnuteqarnermi, qinnuteqartup nakkutigisamik misilitsinneq angusiffigissavaa.

Imm. 2. Taamaattoq nakkutigisamik bil-ersinnaanermut misilitsittoqassanngitsoq, politiinit aalajangerneqarsinnaavoq.

§ 38. Inuussutissarsiutigalugu inunnik angallassinissamut bil-ersinnaanermut allagartamik nutarterinissaq pillugu qinnuteqarnermi, taamatutaaq § 23 aamma § 25, imm. 2 atuupput.

§ 39. Bil-ersinnaanermut allagartaqarnissamut piumasaqaatit qinnuteqartup naammassippagit, bil-ersinnaanermut allagartaq atuutilersinneqassaaq. Qinnuteqartunut 70-ileereersimasunut, tulluuttunik:

- 1) 70-inik ukiulinnut: ukiunut 4-nut,
- 2) 71-inik ukiulinnut: ukiunut 3-nut,
- 3) 72-79-inik ukiulinnut: ukiunut 2-nut,
- 4) 80-inik ukiulinnut: ukiumut 1-mut, atuuffiusussanik aalajangersaasoqassaaq.

Imm. 2. Bil-ersinnaanermut allagartap atuuffia, siusinnerusukkut bil-ersinnaanermut allagartap atuuffiata ullup naaffia tunngavigalugu imaluunniit taanna kingusinneruppata, nutarteriffiusoq ulloq tunngavigalugu, aalajangersarneqassaaq. § 18, imm. 5-imi aalajangersagaq taamatutaaq atuuppoq.

Imm. 3. Nutarterinissap pisinnaannginnerani, bil-ersinnaanermut allagartamik nutarterinissaq pillugu qinnuteqaat tunniunneqarpat, utaqqiisaasumik bil-ersinnaanermut allagartamik politiit atuutilersitsisinnaapput.

Kapitali 10

Nakkutigisamik bil-ersinnaanermut misilitsinnernik ingerlatsisarneq

§ 40. §§ 27 og 28 malillugu nakkutigisamik bil-ersinnaanermut misilitsinnermi, bil-ersinnaanermut allagartaq misilitsinnermik aqutsisumut takutinneqassaaq. Misilitsinneq angusiffiunngippat, bil-ersinnaanermut allagartaq politiinut tunniunneqassaaq.

Imm. 2. Nakkutigisamik bil-ersinnaanermut misilitsittusaaq, misilitsinnermi atugassamik nammineq bil-inik pissarsissaaq. § 7, imm. 4-mi aalajangersakkat, taamatutaaq atuupput.

§ 41. §§ 27 og 28 naapertorlugu nakkutigisamik bil-ersinnaanermut misilitsinneq, tamatumunnga inaarutaasumik aalajangiineq, kingusinnerpaamik qaammatit pingasut kingorna, ingerlanneqartassaaq.

§ 42. Nakkutigisamik bil-ersinnaanermut misilitsinneq, § 9, § 10, imm. 1, aamma § 15 naapertorlugit, immikkoortitikkamut (kategori-mut) B-mut (bil-inut nalinginnaasunut) maleruagassat malillugit ingerlanneqartassaaq.

Imm. 2. Misilitsinneq pineqartup, immikkoortitikkamut (kategori-mut) C-D'mut piumasaqaateqarfiusunut bil-inik, bil-ernerani tunngavilersorneqarpat, Qinnuteqartoq immikkoortitikkamut (kategori-mut) bil-erneranut allagartaqarnissaa imaluunniit allagartaqarnikuusimanissaa piumasaqaataalluni, immikkoortitikkamut tamatumunnga bil-ersinnaanermut misilitsinnermut atuuttut maleruagassat malillugit misilitsinneq ingerlanneqassasoq, politiit aalajangersinnaavaat. Bil-erneranut misilitsinneq angusiffigineqarpat, immikkoortitikkanut pigineqareersunut bil-ersinnaanernut allagartaq atuutilersinneqassaaq.

Imm. 3. Kingusinnerpaamik misilitsinnerit pingajussaanni, nakkutigisamik bil-ersinnaanermut misilitsinneq angusiffigineqanngippat, bil-ersinnaanermut allagartanut tigoqqinnissaannik kissaatigineqartunut immikkoortitikkanut (kategori-nut) bil-ersinnaanermut allagartaq pillugu maleruagassat malillugit, ilassutitut misilitsinnerusinnaasut ingerlanneqassapput. §§ 27 og 28 naapertorlugu nakkutigisamik bil-ersinnaanermut misilitsinnermik angusinnitsoorneq pissutigalugu bil-ersinnaatitaaneq politiitit arsaarinnissutigineqarpat, misilitsinneq angusiffiunngitsoq, misilitsinnertut siullertut isigineqassaaq.

Imm. 4. Bil-ersinnaanermut allagartamik nutarterinnermut atatillugu, ukiuni pingasuni imaluunniit amerlanerusuni bil-ersinnaatitaaneq arsaarinnissutigineqarsimappat imaluunniit akuerisaajunnaarsimappat, imaluunniit nakkutigisamik bil-ersinnaanermut misilitsittoqassappat, bil-ersinnaanermut allagartanut tigoqqinnissaannik imaluunniit nutarternissaannik kissaatigineqartunut immikkoortitikkanut (kategori-nut) bil-ersinnaanermut allagartat pillugu maleruagassat malillugit misilitsittoqassaaq.

Kapitali 11

Bil-ersinnaanermut allagartat Kalaallit Nunaanneersuunngitsut

§ 43. Nunani tamalaani isumaqatigiissutit 24. april 1926-imeersoq, 19. september 1949-meersoq imaluunniit 8. november 1968-imeersoq naapertorlugit atuutilersinneqarsimasunik nunani tamalaani bil-ersinnaanermut allagartaqarunik, imaluunniit Kalaallit Nunaata avataani atuutilersinneqarsimasumik atuuttumik latin-erisuunik naqinnilinnik suliarineqarsimasumik imaluunniit qallunaatumut, tuluttuumut imaluunniit fransk-isuumut nutsikkamik ilaqartinneqartumik, bil-ersinnaanermut allagartaqarunik, inuit Kalaallit Nunaanni najugaqanngitsut, Kalaallit Nunaanniikkallarnermi, Kalaallit Nunaannut bil-ersinnaanermut allagartaqanngikkaluarlutik, bil-ersinnaatitaapput. Taamaattoq, nutsernertaa pisortanit oqartussaataasumut, imaluunniit nunami atuutilersitsiffiusumi tamatumunnga piginnaatitaasumit kattuffimmit suliarineqarsimanissaa piumasaqaataavoq.

Imm. 2. Kalaallit Nunaanneersuunngitsumik bil-ersinnaanermut allagartamik, inuussutissarsiutigalugu inunnik angallassisoqaqqusaanngilaq.

Imm. 3. Kalaallit Nunaata avataani atuutilersinneqarsimasoq bil-ersinnaanermut allagartaq, nunami atuutilersitsiffiusumi bil-inik ingerlassisinnaatitsinermut, Kalaallit Nunaanni bil-inik assingusunik bil-ernissamut piginnittumik pisinnaatitsivoq.

§ 44. Inuk Kalaallit Nunaanni najugaqartuunngitsoq, aammalu § 43 naapertorlugu pisariaqartunik bil-ernermet allagartaqanngitsoq, utaqqiisaasumik Kalaallit Nunaanni bil-ersinnaanermut akuersissummik (takornariat bil-ersinnaanermut allagartassaannik) (turistkørekort-imik) politiit tunisnaavaat. Akuersissut ilaatigut, qinnuteqartup nakkutigisamik bil-ernermet misilitsinnissaanik piumasaqaaserneqarsinnaavoq.

Imm. 2. Takornarianut bil-ersinnaanermut allagartaq (turistkørekort-i), Danmark-imi, Finland-imi, Island-imi, Norge-mi imaluunniit Sverige-mi atuutilersinneqarsimasoq, Kalaallit Nunaanni bil-ersinnaanermut allagartamut ilaatinneqartunik bil-inik ingerlatsinissamut piginnittumut pisinnaatitsivoq.

§ 45. Inuit Kalaallit Nunaanni nunallit imaluunniit nunassittut, Kalaallit Nunaanni bil-ersinnaajumallutik, Kalaallit Nunaanni bil-ersinnaanermut allagartamik peqassapput. Tamatumingga qinnuteqaat, ullut 60-inngortinnagit, politiinut imaluunniit kommunefoged-imut tunniunneqassaaq. Taamaattoq, oqaaseqatigiinni siullerni aalajangersagaq, inunntut, Danmark-imi atuutilersinneqartumut bil-ersinnaanermut allagartamik pilinnut atuutinngilaq.

Imm. 2. Inuit Danmark-imi, Finland-imi, Savalimmiuni, Island-imi, Norge-mi, Sverige-mi atuutilersinneqartumik imaluunniit EU-mi- imaluunniit EØS-imi nunami allami atuutilersinneqartumik atuuttumik bil-ersinnaanermut allagartallit, bil-ersinnaanermut misilitseqqaaratik Kalaallit Nunaanneersuunngitsumut allagartaminnut assingusumik kalaallisuumik bil-ersinnaanermut allagartartaarsinnaapput.

Imm. 3. Bil-ersinnaanermut allagartaq, imm. 2-mi eqqaaneqartuniit nunaniit allaanerusunit atuutilersinneqarsimappat, imaluunniit bil-ersinnaanermut allagartaq sulii 18-liinani pineqarsimappat. Kalaallit Nunaannut bil-ersinnaanermut allagartap atuutilersinneqarnissaa sioqqullugu, pineqartup nakkutigisamik bil-ersinnaanermut misilitsinneq angusiffigissagaa, politiit piumasaqaatigisnaavaat. Taamatuttaaq bil-ersinnaatitaaneq siusinnerusukkut politiinit arsaarinnissutigineqarsimappat imaluunniit Kalaallit Nunaanni piumasaqaatitalimmik imaluunniit piumasaqaatitaqanngitsumik akuerisaajunnaarsinneqarsimappat, nakkutigisamik bil-ersinnaanermut misilitsinnermik angusisimanissaq politiinit piumasaqaatigineqarsinnaavoq.

Imm. 4. Kalaallisuumik bil-ersinnaanermut allagartamik atuutilersitsinissaq pillugu qinnuteqaat, politiinut imaluunniit kommunefoged-imut tunniunneqassaaq. Qinnuteqartup, kalaallisuujunngitsumut bil-ersinnaanermut allagartamut § 1, imm. 1, nr. 1 aamma 2 naapertorlugit asseq kiisalu pisortanit atuutilersinneqartoq kinaassutsimut uppernarsaat ilanngutissavai. Politiini imaluunniit kommunefoged-imi kinaassutsimut uppernarsaammik (stamkort-imik) immersuisoqassaaq. Aammattaaq pineqartoq qallunaatut innuttaassuseqanngippat, pineqartoq inatsisitigut akuerisaasumik, akuersissuteqaqqaarani Danmark-imiissinnaanngippat aamma Kalaallit Nunaanniissinnaanngippat, pineqartoq nunami najugaqarallarsinnaanermut akuersissummik peqassasoq, piumasaqaatigineqarpoq. Bil-ersinnaanermut allagartaq kalaallisuujunngitsoq tunniunneqassanngilaq.

Imm. 5. Inuussutissarsiutigalugu inunnik angallassinissamut bil-ersinnaanermut allagartaq, aalajangersagaq manna malillugu atuutilersinneqarsinnaanngilaq.

Kapitali 12

Oqartussaasut

§ 46. Bil-ersinnaanermut allagartaq Kalaallit Nunaata Politiivinit atuutilersinneqartarpoq. Bil-ersinnaanermut misilitsinnissamut innersuunneqarnissaq pillugu qinnuteqarneq, politiinut imaluunniit kommuneqad-imut saaffiginnikkut pisassaaq.

§ 47. Tamatumunnga toqqagaasumit (misilitsitsinermik ingerlatsisuusartumit) politiimit ingerlanneqartumik Bil-ersinnaanermut misilitsittoqartassaaq.

§ 48. Bil-ersinnaanermut misilitsinnerit pillugit naammagittaalliuutit, Kalaallit Nunaata Politiivinit aalajangiivigineqartassapput. Kalaallit Nunaata Politiivinit aalajangiineq, Færdselestyrelsen-imut naammagittaalliuutigineqarsinnaapput.

Imm. 2. Bil-ersinnaanermut allagartaq pillugu aalajangiinerit allat, ilaatillugit bil-ersinnaatitaanermik arsaagaaneq pillugu aalajangiineq aamma nakkutigisamik bil-ersinnaanermut misilitsinnerit, taamatuttaaq politiinit aalajangiivigineqartassapput. Aalajangiinerit Færdselestyrelsen-imut naammagittaalliuutigineqarsinnaapput.

Imm. 3. Færdselestyrelsen-imut naammagittaalliuutit, Kalaallit Nunaata Politiivinit, suliaq oqaaseqatitalerlugu nassiussissusanut, tunniunneqarsinnaapput.

Kapitali 13

Akitsuut (Gebyr)

§ 49. Immikkoortitikkanut (kategori-nut) B-mut aamma C-D'mut bil-ersinnaanermut allagartartaarniarnermut misilitsinnermut, kiisalu inuussutissarsiutigalugu inunnik angallassinissamut bil-ersinnaanermut allagartartaarniarnermut misilitsinnermut, 450 kr.-inik akiliisoqassaaq.

Imm. 2. Nakkutigisamik bil-ersinnaanermut misilitsinnermut 450 kr.-inik akiliisoqassaaq. Taamaattoq nakkutigisamik bil-ersinnaanermut misilitsinnermut siullermut, § 28, imm. 1, imaluunniit § 32, imm. 1-i malillugu misilitsinnerunngippat, akiliisoqassanngilaq.

Imm. 3. Bil-ersinnaanermut misilitsittoqarneranut, aammalu motorcykel-inut ingerlatsisinnermut allagartamik atuutilersitsinnermut akitsuutit (gebyrer) pillugit, Kalaallit Nunaata Politiivi aalajangersakkanik aalajangersaanissamut piginnaatinneqarput.

§ 50. Atuagarsornermik imaluunniit bil-ersinnaanermut misilitsinnissamut aalajangeriikkamut qinnuteqartoq, ulloq misilitsiffik sioqqullugu kingusinnerpaamik nal. 12:00 takkussinnaannginnermik nalunaarani takkutinngitsoorpat imaluunniit misilitsinnerup ilamernganut angusinngippat, misilitsinnermik nutaamik aalajangiisoqannginnerani, takkutinngitsoorneq, qinnuteqartup, ilinniartitsisup imaluunniit

taassumunnga paarlattaasup allakkiamik uppersaasikkamik napparsimalersimaneranik peqquteqanngippat, nutaamik akiliisoqqaassaaq.

§ 51. Pisunni tulluuttuni

- 1) § 45 naapertorlugu kalaallisuujuunngitsoq bil-ersinnaanermut allagartaq tunngavigalugu kalaallisuumik bil-ersinnaanermut allagartamik atuutilersitsinermut,
 - 2) § 49 naapertorlugu pigisimasaraluup bil-ersinnaanermut allagartap tammaanera imaluunniit ajoquteqalernera pissutigalugu bil-ersinnaanermut allagartap assilineranik atuutilersitsinermut,
 - 3) bil-ersinnaanermut allagartallup bil-ersinnaanermut allagartamut allannguutinik allattoqarnissaanik kissaateqarnera pissutigalugu bil-ersinnaanermut allagartap assilineranik atuutilersitsinermut,
 - 4) § 8 naapertorlugu ilinniartitsisutut akuersissutitalimmik bil-ersinnaanermut allagartamik nutarterinissamut, aamma
 - 5) Inuussutissarsiutigalugu inunnik angallassisinnaanermut, bil-ersinnaanermut allagartamik nutarterinissamut, taamaattoq imm. 4 takujuk,
- 200 kr.-inik akiliisoqassaaq.

Imm. 2. Qinnuteqartunut, 70-ileereersunut, bil-ersinnaanermut allagartamik nutarterinissamut, 30 kr.-inik akiliisoqartassaaq.

Imm. 3. § 18, imm. 5 malillugu killilimmik piffissaligaasumik bil-ersinnaanermut allagartamik nutarterineq, akiliinertaqanngitsumik pisassaaq.

Imm. 4. § 25, imm. 2 malillugu peqqissutsimut tunngassutillit pissutsit peqqutigalugit killiligaasumik inuussutissarsiutigalugu inunnik angallassinissamut bil-ersinnaanermut allagartamik nutarterinermut, 100 kr.-inik akiliisoqassaaq.

Imm. 5. Politiinut aningaasanik akiliisoqassaaq.

Kapitali 14

Unioqquitsinerit, atuutilersiffik aamma ikaarsaarnermut aalajangersakkat

§ 52. § 2, imm. 1, §§ 7 aamma 11, § 19, imm. 1 aamma 3, §§ 30, 40, 43 aamma 45-mik unioqquitsineq, Kalaallit Nunaannut pinerluttulerinermik inatsit malillugu pineqaatissiissutinik kinguneqarsinnaavoq.

Imm. 2. Nalunaarut naapertorlugu akuersissummut piunasaqaatinik sumiginnaaneq imaluunniit nalunaarut naapertorlugu nalunaarutigineqartunik inerteqquutinik imaluunniit peqqusissutinik naammassininnginneq taamatutaaq Kalaallit Nunaannut pinerluttulerinermik inatsit malillugu pineqaatissiissutinik kinguneqarsinnaavoq.

§ 53. Nalunaarut ulloq 1. august 2024 atuutilersinneqassaaq.

Imm. 2. Kalaallit Nunaannut bil-ersinnaanermut allagartaq pillugu nalunaarut nr. 952, 23. november 1994-imeersoq, atorunnaarsinneqarpoq.

Imm. 3. Kalaallisuujunngitsumik bil-ersinnaanermut allagartaqartut inuit Kalaallit Nunaanni najugaqartut, § 45 naapertorlugu, bil-ersinnaanermut allagartamik kalaallisuumik pissarsinissamik tungaanut, bil-ersinnaanermut allagartaq taanna tunngavigalugu, unioqqutitsinngitsumik bil-ersinnaasut, Kalaallit Nunaata Politiivisa aalajangersinnaavaat.

Imm. 4. Kalaallit Nunaannik illersuinissaq pillugu kunngeqarfiup Danmark-ip aammalu Amerika-mi Naalagaaffiit Peqatigiit naalackersuisuisa akornanni Atlantikup Avannaani Isumaqtigiissut naapertorlugu København-imi ulloq 27. april 1951-imi pineqartoq isumaqtigiissutaasoq pillugu nalunaarummi nr. 23, 20. juni 1951-imeersumi ilanngutassiaq 2, nr. 3-mut ilaatinneqartunut nalunaarut manna illersornissamut suliasaqarfinnut atuutinngilaq. Aaqqissuussamik nalunaarummi aalajangersagaasumik ingerlatsinissamut, politiinik pisariaqartunik tamakkununga aallartitaqarfiunngitsunik, sumiiffinnik taamaattunik immikkut ittunik aalajangersimasunik nalunaarut ilaqassanngitsoq, Kalaallit Nunaata Politiivisa aalajangersinnaavaat. Oqaaseqatigiit aappaanni eqqaaneqartunut sumiiffinnut, Kalaallit Nunaata Politiivi maleruagassanik immikkut ittunik aalajangersaasinnaasut.

Ilanngussaq 1

1. Bil-ersinnaanermut misilitsinermut siunertaasoq

Bil-ersinnaanermut ilinniarnep siunertarisatut aammalu bil-ersinnaanermut allagartartaarnissamut piunasaqaataasut ilisimasassat aamma pisinnaasassat ilinniartup pissarsiarisimanerai, misilitsinermik nakkutilliisup nalilissagai, bil-ersinnaanermut misilitsinnerup siunertarivaa.

1.1 Misilitsinnissamut piunasaqaatit aamma ilinniarnermi angusassat

Kalaallit Nunaannut bil-ersinnaanermut allagartaq pillugu nalunaarummi matumani kiisalu Kalaallit Nunaanni bil-ersinnaanermut ilinniarnermut 'Ilinniutitut Atuakkami' (Teoribog-imi), bil-ersinnaanermut ilinniarnep aamma bil-ersinnaanermut misilitsinneq, imarineqarput.

2. Atuagarsornermut misilitsinneq

Bil-inut nalinginnaasunut misilitsinneq, nalinginnaasumik nalunaaquttap akunnerata affaanik sivilissuseqartarpoq. Misilitsinneq allattariarsorneruvoq, politiiniillu akuerisaasunik atuagarsornermut misilitsinnermut atortunik atuilluni ingerlanneqartassalluni.

- A. Qinnuteqartup, atuagarsornermut misilitsinnermi, angallannermut maleruagassanik tulliuuttunik ilisimasaqarnini uppersassavaa:
1. Misilitsinnermut atorneqartunik bil-erisanik aqutsinermut pingaarutillit angallannermut maleruagassat.
 2. Qinnuteqartup misilitsinnermi, pingaartumik maleruagassat tulliuuttut ilisimasaqarfigilluarlugillu paasillaarsimassavai:

- 1) Soqutigittartumik pissusilersornissaq aammalu angallannermi misissorneq pillugit maleruagassaq nalinginnaasoq.
- 2) Angallannermi ajutoornermi pisussaaffiit pillugit.
- 3) Bil-it aqquataanni inissisimaneq, ilaatillugit sanguneq aamma utimut saanneq pillugit.
- 4) Naapikkiartorneq, qaangiineq, bil-it aqquataannik nikinneq pillugit.
- 5) Tunuarsimasussaatitaanermut aalajangersakkat.
- 6) Pisuinnarnut, angallattut immikkut ittut aamma qimussit uumasuutillu angallanneqartut pillugit pisussaaffiit.
- 7) Uninneq aamma inissinneq pillugit aalajangersakkat.
- 8) Sukkassutsit pillugit aalajangersakkat.
- 9) Aquttuusup aamma piginnittuusup akisussaaffii aamma pisussaaffii.
- 10) Atuarnikkut ilikkagaqarsimaneq pillugu aalajangersakkat.
- 11) Politiit angallannermut aalajangersaanerat, qaammartitsilluni kalerrisaarutit, aqqusinernik nalunaaqutsersuinerit – ilaatillugit Kalaallit Nunaanni atorineqartut angallattunut sianigisassatut takussutissiat, tamakkualu isumaat.
- 12) Angallannermut inatsimmik ilisimasaqarneq, napparsimaneq aamma aalakoornartoq tamakkualu aquttup qisuariarsinnaassusianut sunniutaat pillugit maleruagassat.
- 13) Qaammaqqusersorneq pillugu angallannermut inatsimmi maleruagassanik ilisimasaqarneq.
- 14) Kalerrisaarutit aamma assilissat pillugit angallannermut inatsimmi maleruagassanik ilisimasaqarneq.
- 15) Orsussap ikumanikuinik ipinartunik najuussuinerup ulorianaataanik ilisimasaqarneq.

3. Bil-ertermik misilitsinneq

Misilitsinnermut, nalinginnaasumik minutsit 30-niit minutsit 45-t tungaannut, immikkoortinneqartarput.

A. Bil-it pequtsersugaanerit aamma atortui pillugit qinnuteqartup tulluuttut allakkiatut uppersarsinnaassavai:

- 1) Aquutaa piuminartumik, qularnaatsumik sukkasuumillu atorineqarsinnaassaaq. nungullaannerit imaluunniit assigisaat pissutigalugit, aquutaa ataatsimut isigalugu imaluunniit pisataani ataasiakkaani, malunnaatilimmik qasukkaanneqaleqqusaanngilaq.
- 2) Aquutaani qasukkaannermik uuttuineq aamma aquutaani qasukkaanneq akuerineqarsinnaanersoq pillugu paasinninneq.
- 3) Brems-it (unissaatit) pissusissamissoornerit qanoq paasineqartarnerannut ilisimasaqarneq.
- 4) Silaannaqanngissutsimut sakkortusaataata (Vaccumforstærkerens) naqitsinera, motor-i uninngatillugu, bremsepedal-imik (unissarnermut tukertakkamik) arlaleriarluni tutisinikkut assigiissarneqartarpoq.
- 5) Bremsepedal-i (unissarnermi tukertagaq) naleqquttumik malunniunnani nikissinnaaffeqassaaq.
- 6) Ataasiaannarluni tukersinermi, qaffasinnerpaaffiata aamma appasinnerpaaffiata akornanni nikissinnaaffiata affaa missiliorlugu annertussusilimmu killiffimmu annerpaamik bremsepedal-i naqinneqarsinnaassaaq.

- 7) Bremsepedal-i (unissarnermi tukertagaq) tuteqqaatigalugu, motor-i aallartillugu, Bremsepedal-ilu (unissarnermi tukertagaq) appariaallannersoq maluginiarneratigut, silaannaqanngissutsimut sakkortusaataa (Vaccumforstærkeren) atuunnersoq misilinneqassaaq.
- 8) Bil-inik inissiinermi assammik nusuttaga q brems-i, naleqquttumik malunnaateqanngitsumik nusulaarsinnaassaaq, aammalu tamakkiisumik nusunnerani, sukaqqalluni uninngasinnaassalluni.
- 9) Qinnuteqartup, oqariartaatsit qisuariarnissamut takissuseq, bremserluni unissarnermut takissuseq aamma uninnissamut takissuseq ilisimasaqarfigissavai. Pineqartup, bremserluni unissarnerup takissusaata aamma sukkassutsip akornanni pissutsit (kisianni atuagarsornermut atuakkami allassimasut, bremserluni unissarnermut takissusermut il.il. sukkassutsinut ataasiakkaanut – tamatumani assersuutigalugu sukkassuseq marloriaatinngoraangat, bremserluni unissarnermut takissutsip sisamariaatinngortarnera, akerlianik qisuariarnissamut takissutsip taamaallaat marloriaatinngortarneranik, annertussutsit pinnagit), ilisimasaqarfigissavai. Aquttuusup qisuariarsinnaassusaa, brems-it qanoq issusaat, bil-ip sukkassusaa, aqquuserngup pitsaassusaa, aqquuserngup qalligaanera aammalu aqquuserngup uinganera, unissarnerup takissusaanut sunnuteqarnerat qinnuteqartup ilisimasaqarfigissavai. Aammattaaq piffissamut qisuariarfissamut aammalu assakaasut parnaarlugit bremsernerup siunertamut akerliuneranut, sillimaniarnermik inisseqqanerup isumaa qinnuteqartup ilisimassavaa.
- 10) Bil-it aqunniarnerinut- aamma unissarluni brems-ersinnaassusaannut, assakaasut torlunnermut sakkukillisaataasa sunniutaat.
- 11) Bil-it aqunniarnerinut- aamma unissarluni brems-ernissamut isumannaassusermut assakaasut qanoq issusaasa sunniutaannik ilisimasaqarneq.
- 12) Bil-inik eqqortumik passussinermi aamma aserfallatsaaliuinermi, pisariaqanngitsunik nipiliornernik il.il., pinaveersaarinnissamik ilisimasaqarneq.

Angallannerup isumannaatsuunissaanut sunniutilinnik amigaatinik pisoqalersinnaanerani paasisaqarsinnaanngorneq, bil-inut taakkualu passunnissaannut qinnuteqartoq ilisimasaqarnersoq aalajangiiffigissallugu, immikkoortuni 1-imiit 12-imut allassimasumi misilitsinnermut piumasaqaatini, siunertaavoq. Tamatuma akerlianik, sannaasa ilusaannik, atortorissaarutitigut immikkuualuttunik aammalu atortorissaarutit taaguutaannik, soraarummeersitsissutigineqaqqusaanngillat.

B. Misilitsinnermut ingerlatsisumut

Misilitsinnermik ingerlatsisuusoq, nalinginnaasumik isumannaassusermut eqqarsaatiginnineq imaluunniit angallannerup ingerlatinneqarnissaa tamatuminnga pisariaqalersitsippat kisianni allatigut akuleruttariaqarani, misilitsinnerup ingerlanerani, aqunnermut atortutigut akulerutissaaq. Misilitsinnermik ingerlatsisuusoq, ajornanngippat siunnersuinaveersaassaaq, kisianni qinnuteqartup pissusilersornera qimerluussallugu. Angallattunut allanut aamma aqqusernermut-, silamut-, aamma qaamanermut pissutsinut naleqqiullugu qinnuteqartup angallannermi maleruagassat eqqortinnerai, pineqartup angallannermut tulluarsarnerani paasisimaneraa, ingerlaninilu (ilaatillugit sukkassutsini aamma bil-erisat bil-it aqquutaanni eqqortumik ingerlannerlugit)

tulluarsarneraa, qinnuteqartoq, angallannermi pissutsinik navianarsinnaasunik (aqquserngit paarlannerannik, meeqqanik pinnguartaunik il.il.), ilaqaleraangata sillimaniarnermik inissittarnersoq, angallattunut allanut pisariaqartumik eqqarsaatiginnittarnersoq allatullu angallanneq pisariaqanngitsumik akorngusinnginneraa, pisariaqartumik eqqissisimanermik aamma qisuariarsinnaanermik ersersitsisoqarnersoq, bil-ini atortut eqqortumik aammalu pisariaqartumik sungiussisimassuseqarluni passunnerai kiisalu bil-erneq eqqissisimassuseqarluni, ilaatillugu angallannerup pisoqarfiuneranik siumut naatsorsuisinnaassuseqartumik ingerlanneraa, pingaartumik qimerloorneqassaaq. Qinnuteqartoq eqqarsartaatsikkut timikkullu pisariaqartumik periallaqqissuunersoq aamma isumanaassusermut pingaaruteqartutut nalilerneqarpat, qinnuteqaammi pisariaqassappat tamatumingaa oqaaseqaateqarnissamik, misilitsinnermik ingerlatsisusooq eqqumaffiginnittariaqarpoq.

Misilitsinnermut pisariaqartut innersuussutit, misilitsinnermut ingerlatsisumit ima erseqqitsigisumik aammalu ima piffissaqartitsilluartigisumik tunniunneqassapput qinnuteqartoq innersuussummik paasinninnissamut iliuseqarnissamullu naleqquttumik piffissaqartilluarlugu. Angallannermut maleruagassanut akerliusumik qinnuteqartup iliuseqarnissaanut pissutissaqalersitsisumik, innersuussutinik tunniussisoqaqqusaanngilaq. Misilitsinneq ima siulersussallugu, angallattunut allanut sapinngisamik annikinnerpaamik ajoqutaasumik pisoqarnissaa, misilitsinnermut ingerlatsisusooq pisussaaffigaa.

C. Bil-erneq sioqqullugu isumannaallisaanermut sillimmartaarutit

Misilitsinnerup aallartinnerani, misilitsittussap sanianut ilaasup inaanut misilitsinnermut ingerlatsisusooq ingissaaq. Qinnuteqartoq bil-ernissamut inissisimanermik siunertamut naleqquttumik inissinnersoq (aquttup issiavianik inissiilluarluni) aamma pineqartoq isumannaallisaanermut sillimmartaarutinik pisariaqartunik assersuutigalugit aquttumut tarrarsuutinik inissitsiterineratigut, qimerluuinersooq, igalaat tamarmik pisariaqartumik isikkiveqarnerannik qulakkeerinersooq aammalu kalerrisaarutitut atortunik, brems-inik aquummillu misiligaaneratigut nakkutigineqassaaq.

D. Aquttaatsit immikkut ittut

Misilitsinnermik ingerlatsisusooq qinnuteqartup bil-it aallartitsinnagit bil-it frigear-imiinnerannik assammillu brems-ip nusulluaqqaneramik qulakkeerisimanissaanik eqqumaffiginnissaaq. Aqqusinerni angallaffiuallaanngitsuni aqunnermut misiligaatinik, soorlu illuanut saannernik, aallariarnernik, uteriarsornertalimmik pisuinnaat aqquataasa sinaannut inissinnermik, ingerlataqartoqassaaq. Qinnuteqartup misilitsinnerit tamakkua nalaanni angallattunut allanut, pisuinnaat aqquataasa killinginut il.il. naleqqiullugit bil-it killigisaannik ilisimanneqqissaarnermik takutitsissaaq. Qinnuteqartup, ungasissutsit aamma sukkassutsit eqqortumik nalilersinnaassavai, aqqusinikkut sivingasukkut brems-it atornissaat, aammalu illuatungaanut saanniarnermi siumorsornermiit uteriarsornermut nikittarnek paasisimassallugu, assammillu brems-erutip atorneratigut sunniuteqarluartumik brems-erneq paasisimalluassallugu. Sangusaqattaarnerit iluanni qinnuteqartup angallattut allat eqqarsaatigiuassavai.

Illoqarfinni, angallannermut pissutsit ajornartorsiornartigalutik, bil-erluni misilitsinneq kissaatigisatut ingerlanneqarsinnaanerata pisinnaangiffianni, aqunnermut misilitsinnerit naleqquttumik annertusaaserneqartariaqarput.

E. Illoqarfimmi bil-ernevermut misilitsinneq

Ilaatigut sumiiffinni angallaffiuallaanngitsuni ilaatigullu nalinginnaasumik angallaffiusuni, sukkassutsimi nalinginnaasumi bil-erneq ingerlanneqassaaq.

Illoqarfimmi pingaarnertut angallaffiusumi, sapinngisamik illugiisillugit attuumassutilinnik aqqusinilimmi ilaatigut amitsunik aqqusinilimmi, sumiiffinni bil-ertoqassaaq. Ingerlavik ima, aqqusinerniit angallaffiorpiannngitsuniit aqqusinernut annerusunut killormullu sanguffiusartunik aqqusaartuisumik aqqqissuunneqartariaqarpoq.

Bil-erneverup nalaani, igalaat saligutaat, kiassaat, kanerneriaat, qulliit (ilaatillugit qaammaqputinik sakkukilliliineq) aamma igalaavinik ammaatiterineq aammalu matooraaneq, qinnuteqartup atorsinnaasariaqarpai.

Sumiiffimmi pissutsit periarfissaqartitsippata, misilitsinnerup nalaani bil-inik allanik qaangiinnermik misiliisoqartariaqarpoq.

4. Ulikkaarlutik usillutik 3500 kg.-ut sinnerlugit oqimaassusilinnik bil-inik bil-ersinnaanermut allagartamut misilitsinneq

Immikkoortuni 1-imiit 3-mut eqqaaneqartut saniasigut, aammattaaq bil-it tamakkua pillugit (brems-iisaa atortoqarfiinut, usilersornermut maleruagassanik immikkut ittunut) aalajangersakkanut immikkut ittunut ilisimasaqarnermik, misilitsinneq ilaqarpoq.

5. Misilitsinnermik naliliineq

Politiit malittarisassiaat malillugit atuagarsornertaanut misilitsinneq nalilerneqassaaq.

Bil-ernevermik misilitsinnermi sungiussisimarpaluttumik imaluunniit kukkuneqanngitsumik bil-ersinnaaneq piunasaqaatigineqaaqusaanngilaq, kisianni, ilungersunartut aamma annikinnerusumik ilungersunaatillit kukkunerit akornanni immikkoortitsisoqassalluni. Qinnuteqartup bil-ernevera ataatsimut isigalugu nalilerneqartussaammat, kukkunerit annikinnerusut ataasiakkaat, misilitsinnermut angusinnngitsoornermik nassataqartariaqanngillat. Qinnuteqartup naammassisai, annikinnerusumik ilungersunaatilinnik arlalinnik aammalu pingaartumik uteqqiattunik kukkunernik ilaqarpata, misilitsinnermik ingerlatsisuusup naliliinera malillugu misilitsinneq angusiffiunngitsutut isigineqartariaqarpoq. Qinnuteqartup, pissusissamisoortumik annilaanganerminik ajugaaffiginninnissaminut piffissalernerneqartariaqarnera eqqarsaatigalugu, misilitsinnerup aallaqqaaterpiaani, nalinginnaasumik aalajangiisuusumik naliliisoqaaqusaanngilaq. Taamaattoq, angallattunik allanik apuisinnaaneq pinngitsoortinniarlugu, misilitsinnermik ingerlatsisuusok akuleruttariaqarpat, tamanna atuutinnngilaq.

Kukkunerup ilungersunartutut imaluunniit annikinnerusumik ilungersunartutut isigineqarnissaa pillugu aalajangiinermut tunngaviusussat, tassaapput pingaarnertut angallannermi isumannaallisaanermut kingunerisassai, tamatumunngalu tulluullugu angallannerup akornguteqanngitsumik ingerlanneqarnissaa. Sumiissusersiornerit imaluunniit aqutsinerit pillugit kukkunerit, apuisinnaanermik, imaluunniit ajunaarnermik allamik, pisoqarsinnaaneranik nassataqartut, ilungersunartutut isigineqarput. Taamaattumik kukkunerit taamaattut imminni, misilitsinnermik angusinnitsoornertut isigineqarsinnaapput, pissutsillu malillugit misilitsinneq unitsinneqarsinnaalluni.

Aqqusinermi taamatut inissisimaffeqarluni siumut ingerlalluni imaluunniit taamatut sukkatigaluni, qinnuteqartup eqqarsaatiginnilluarnermik aamma naatsorsuisinnaassusermik amigaateqarnermik erseqqissumik takutitsineranik ilimanaatilimmik nueriataarsinnaasunut, akorngutinut ersinngitsunut sumiissusersinissaminut aamma uninnissaminut qinnuteqartup angumerisinnaanngisaanik apuisinnaanermik imaluunniit ajunaarnermik allamik imaaliallaannaq pisoqarsinnaaneranik pisunik taamaallaat ilaqanngilaq. Tamanna assersuutigalugu sangusarissani isikkiviluttuni imaluunniit qattunerni aammalu isikkiviluttuni aqquserngit paarlaffiini iluiniunniit siumut ingerlanermi atuuppoq.

Bil-inik ingerlatsinermi uteqqiattumik kukkunerit, pisariaqartumik isumannaassusilimmik qinnuteqartup bil-inik aqutsisinnaannginnera, erseqqissumik qulaajartarmassuk, ilungersunartutut isigineqartariaqarput.